

道光遵義府志

遵義府志卷三十

宦績二

遵義道

明

張悌

陳志河南人倜儻有才慷慨自許夙以邊

才著名以憲長分守川東時我兵攻賊囤將下節督

撫報外艱人情漸懈弛悌獨冒暑單騎走監諸營激

勵將士竟以平賊謀畫善後始終功多後遷巡撫大

同歸尋卒遵義道題名碑悌萬曆三十年二月任

傅光宅

巴縣志山東聊城進士萬曆中以御史左

遷歷工部郎知重慶府時播賊猖獗總制李化龍駐
渝城宅督理戎馬軍糧有方略陳志平播之功贊畫
爲多後遵義府缺當事者趣入視事安輯夏彝招撫
流移弔忠義瘞遺骨周貧困恤瘡痍振學禮神視理
重慶尤加虔恭尋授遵義道復改督學爲忌者所中
歸卒

崔應麒

陳志播平初以方伯行觀察使天性公忠

御下恕坦先是道與郡相水火每以小故相扼應麒
至一切長厚以待道郡相洽又議蠲田價以安反側
新舊二均感頌後以他事掛彈章去郡人祠祀之

起巡撫陝西

孫學易 雲南通志 楚雄人萬厯壬辰進士任寧國府推官斷獄無冤厯遵義道副使不畏彊禦士酋奢崇明陰懷反側學易欲破其謀請於當事不果行至後猖獗騷動三省眾方服其先見擢陝西右布政使致仕歸

李必達 陝西通志 字中孚城固人萬厯甲午舉人性倜儻不群精奇門遁甲厯官遵義副使天啓間奢賊陷重慶必達畫謀決勝攝服賊眾稱為神兵後罷職川人感慕立祠祀之

按陳志職官兵備道題名有李仙品稱陝西人進士天啟四年任後復任陞偏沅巡撫通志沿之並無李必達明史盧安世傳天啟五年四月朱燮元上言稱永寧破巢之後皆監司李仙品等功與陝志敘必達其官其時事籍貫並合知決非兩人名之不同非可臆解故題名從前志官績從陝志或本是二人前志漏略各從舊載亦無傷焉

盧安世 明史本傳貴州赤水衛人萬曆四十年舉於鄉爲富順教諭天啟初奢崇明反遣還取縣印署令棄城走安世收印率壯士擊斬賊無何賊數萬卒

至安世單騎鬪手馘數人詣上官請兵復其城帝用
大學士孫承宗言超擢僉事監軍討賊屢戰有功五
年四月總督朱燮元上言自遵義五路進兵永寧破
巢之後大小數百戰禽獲幾四萬人降賊將百三十
四人招撫羣賊及土漢苗仲二十九萬三千二百餘
人皆監司李仙品劉可訓鄭朝棟及安世等功武將
則林兆鼎秦翼明羅象乾上官則陳治安冉紹文悅
先民等帝納之安世進貴州右參議遷四川副使遵
義監軍功復多崇禎初予世廕武職進右參政久之
解官歸卒陳志天啟五年任遵義道時遵爲賊將扶

國禎所據安世統兵親勦恢遵分兵屯田以省川運
招撫逃民各歸本土防禦周密士民樂業歷任九年
以勞瘁告致闔屬至今頌德不衰通志字環水天啟
中任巴縣學博奢賊掠城縣令死之安世鼓集義勇
誘賊渠孟寶山入城斬首持示賊驚潰掩殺無算
謝瑄通志雲南楚雄縣人崇禎癸未任遵義道
丁亥流寇孫可望過遵瑄督兵董公寺防禦爲賊所
擒賊欲屠遵城瑄曰苟止殺吾當從汝賊許之民賴
以全賊强之人滇遂自縊於貴陽縣學宮郡人程生
雲賦有遵民免難篇雲南通志崇禎癸酉舉人任四

川遵義推官以廉幹稱擢遵義兵巡道

國朝

劉彪雲南通志字玉菴建水人天性孝友丁亥
流寇破臨安其弟被掠彪以身易弟歸養母流離黔
蜀者數年及王師平蜀彪率眾投誠以功授分巡遵
義道修學禮士安民靖寇遵人感之康熙戊申裁缺
家居好善樂施會吳逆叛欲餌以官卻之人稱為清
節名臣遵郡紀事彪奉職六年關防嚴肅

遵義府

明

劉安仁 陳志播平初知遵義府執法鋤兇不避嫌
怨不事俛仰善良獲安而有卻者危中之恚恨以卒
人至今惜之

周作樂 雲南通志萬厯壬午舉人知巴縣政事廉
平升知澤州綜核繁劇有聲晉戶部員外陞工部郎
中會計營繕有條理出知遵義府所至以誠感人遵
人化之母老乞歸遂不出仕綦江志字和字雲南昆
明縣人初知萬縣報最特補郡丞萬厯二十七年播
賊躡綦神宗震怒命八路會勦戎事孔急下邑非才
幹人不堪任乃以周攝縣事王師臨渝更畫平酉諸

策當事再三稱善旋卽開拓新疆添設郡縣百務蠲
集凡諸善後事宜罔不貼妥天子下璽書加勞賜黃
金彩幣以酬勲伐至萬厯三十四年陞遵義太守去
邑人爲立生祠

孫敏政 陳志湖廣興國人以重慶府同知承檄入
播凡善後事多藉理焉監督丈量身親阡陌經理賦
役悉心計籌務求妥便不苟且塞責尤爲百世利賴
尋陞遵義知府通志敏政爲府絕苞苴禁饋獻嚴構
訟鉏豪猾極疾苦恤災祲

黃立言

陳志江西廣昌縣舉人辛未年任遵義知

府清介飭躬勸農息訟重情必讞刻木隸爲差不用
勾攝平情剔奸瘡痍得安衽席考秩著天下清官第
二郡人至今頌德

馮鳳雛

明史朱燮元傳奢崇明再陷遵義殺推官

馮鳳雛

蘇樸

明史張振德傳遵義司獄蘇樸義不污賊

墜城死

按凡附載張振德傳者並死於奢崇明之叛

程聖訓

通志字心魯貴陽人性謙和汎愛不欺以

歲薦知巴縣賊破城聖訓抱印投水流三十里如有

物負之得不死歷遵義守潔已愛民人皆呼爲老佛

卒於官貧不能殮子春翔舉於鄉春化由明經授四
川仁壽令值寇亂城陷整衣冠向闕再拜自經死春
躍亦以明經官縣令孫桂蕃亦舉於鄉

常三錫 遵郡紀事江西舉人崇禎中來守遵義一
介不與取法治禁令教養爲先詞訟呈入卽准有關
重事卽提審結無情細故准而不行謂不准批出必
使原告之心反熾存之以起疑畏事延日久暴怒自
消而訟息矣往往以此意勸民天下清官著爲第一
有子來任匝月出俸十金諭曰此君恩也付爾還家
子吉以費不足斥曰吾作好官爲遺福爾輩言不足

是欲我於民取之卽取之爾輩豈能長遠哉爾輩富於讀書行德內求之方是真福倚父爲官是假福耳終何爲書吏共歎息醵金呈進斥云汝等此意使吾子人人欲豈不肖多矣且吾有子十人今與多金是爲未來者開之端也終不允其座銘云若要利息便無子息若要子息便無利息守郡十年囊如貧士十子進士三舉人五廩生二去郡時年七十郡人立生祠於城隍廟右

國朝

郭友龍

遵郡紀事

北直人

通志

河

歲貢

康熙

九年

知遵義府賞罰嚴明紀綱秩然墜永寧道去任

李師沆

遵邵紀事湖廣人

通志陝西涇陽人

蔭生康熙二

十四年知遵義府凡三知理事批狀簽票拘兩造證
佐畢集然後尅日升堂人役序班從容鞫斷案結已
各取保乃得釋一件之延動以月計雖小民冤抑得
伸卽飲食費已不貲矣曠時失業更不待言師沆鑒
此獨一切不然有控隨到隨審隨結隨釋一二年間
案牘漸少於同官中傲上漫下以權務與通判朱焜
皆被議去官羅兆姓署府李公壽序癸亥冬探木使
者入遵簡幹吏與偕遼左李公以合江令從一時虎

而冠者所在駟騷公匡救幹旋爲德於遵甚鉅遵民
呼天祝曰安得是人守我遵乎天何不以畀我越十
有五年公果以涪州司馬來攝郡篆父老子弟塞帷
審祝歡相告曰曩者德我之人至矣豈天真以畀我
耶而公歷舊遊誦子瞻所至如歸之句亦良自喜於
是革穉政除蠹胥清糧弊凡少有便於民者無不力
行而明察震厲之中一以安靜休養爲事蓋三越月
而遵大治遵人知不可以久稽也羣走省會乞中丞
專疏題畱而公嶽降哀在春三月因述情走書乞予
言以壽予笑曰天下當爲天下用豈遵人所得而

而私者然遵人望公而公果至則留公亦必或留果
疏入諧所願而後乃今天真以公弭遵矣周公之在
東也東人恐其歸爰有衮衣之歌孔子攝相三月魯
人亦歌衮衣不知遵人今亦有歌詩否當時周公之
去孔子之攝亦有制制具詞於成王魯公之前乞去
者暫留攝者卽真否古今人同不同未可知也夫人
所樂得而留者天自樂而壽之此必然之理也宋人
訓天爲理豈誣也哉余言不敢談書此壽公他年傳
循良者或於此乎採擇也

蔡毓華

正安志漢軍正白旗人康熙十九年同兄

綏遠將軍毓榮恢復雲貴賊平復安反側籌兵食給牛種勤耕作創定規條滇黔仰賴邇郡紀事毓華以康熙二十七年知遵義府在任三年輕徭薄賦禮士親賢囹圄空虛杖校生靈二十九年東隅里報產丹砂求設廠毓華曰丹出於土厚薄未可知廠額一定勢必取盈且今日廠成明日匪徒畢集無論砂給不給終必累民隨諭封禁貪民涇利不巳私聞大吏毓華力詳止之旋卒官遵人若喪父母立祠祝釐寺右偏奉祀隨公請准入名宦祠陳懷仁蔡公廢祠訃略手裁整肅鉏奸惡植良善四野風清各安職業且謙

恭無貴介氣禮賢下士率興文教歷任三載卒

童華祖 遵郡紀事字禹山浙江紹興人由鄉薦官

刑部郎中康熙四十九年閏七月知遵義府甫視事
衙門頹弊一切革除隨榜於門曰受詞訟半點私天
誅地滅要兵民一文錢男盜女娼觀者皆吐舌有下
淚者聽斷嚴明賞罰不貸而其慈祥懇摯視兵民疾
苦不啻痼癢在身也獎藉士類孜孜常恐不及遵義
凡官出入夫馬酒食費皆供之民間吏役復浮派之
民往往不堪其擾華祖悉罷免每行縣雞犬不驚歌
頌之篇積成卷軸此梨彼棗翕焉互傳輿情猶覺未

伸合詞呈請稍受薪水之助批云採山雖便飲水非
貪而迹設於供應此端一開何事不可接踵而起乎
寧苦一身卽到水窮山盡不敢頓改素履也爾等美
意誌諸心版終不允一時賢聲載道稱西蜀廉吏第
一季先立壽童太守序略遵義僻處天末凡徵斂溢
常賦外者不可毛舉上下視爲固然莫之或救嗟夫
利之所在其端未兆尚將啓之况積習旣成勢將何
所不至哉康熙四十八年酷吏催收誅求無藝縣民
楊君詔等控川撫不允乃走控貴州巡撫劉公蔭樞
有苛求髓盡棄虐投仁之語劉以入告知府王元弼

特簡賢良

知縣高洪皆立罷且盡掣四省効力人員歸部大選
以惠我民人童公膺其選單車赴任人無迎候之
勞里無供億之擾山谷小民尚不知有新太守視事
皆公仁厚恬淡與民休息數月積弊一清偶值久雨
粟米騰貴游手猖狂乘釁劫奪告詞紛積公佯若不
聞也者事稍定急取其階厲者杖斃之餘黨皆斂戢
斯時也治之稍急則革合易成稍緩則蔓延未已神
明暇豫不動聲色而措全郡於泰山之安有古大臣
從容濟變之風焉三年政成中丞第上公績爲九府
最且檄隨䟽入覲士民皇皇挽留無計飲食必呼燕

會必祝及

天子軫念邊民以公再領原郡邇人聞之莫不舉手加額如獲再生鳩工庀材建坊表道以志重來之慶公峻拒之不顧也初郡南突產丹砂奸商蠹販欲擅以牟大利多方睽公不爲動值公北上適撫軍有開設諸廠繕理茂州城垣一疏豪右乘以鼓動上官信之符牒已下而公復至竟寢不行呼其人杖遣之其保全我室廬邱壠使不爲奸宄通藪何思深而慮遠也

趙光榮 陝西神木人康熙末守遵義民風士氣多方救補以府學宮頽圯倡募新建舊時學使供給一

切派之應試生童光榮取僧田之構訟者數十分以

爲棚田收歲租給院考之費士民至今德之

新編

蘇霖泓 心齋隨筆字雨蒼雲南趙州人康熙丙子

舉人知廣西容縣擢貴州大定知州

是時大定尚未改府

雍正

十年升遵義知府先是五屬關稅外又有遵義縣小

板等十四山場綏陽縣永興桐梓縣新街等山場權

小稅銀四百餘兩市物不過粟布果蔬薪炭一切徵

之不足則科市民鄉里舊設義倉名備荒實奸胥盜

罄官將核實復大斂於民旋歸私囊霖泓至力請題

免場稅復於城中建大有倉專積貯罷鄉里虛斂民

以蘇息平水里有碑紀其事十三年征黃平州古州
九股諸苗以霖泓督糧臺司議照通省田糧派運霖
泓以各府去古州丹江遠者且二千里一概派運重
累民力沮之請制府設臺馬遞運楚米建倉龍頭河
貯之舟運粵米轉運各營至賊平兵無匱食而民不
擾霖泓在任八年尤加意學校葺文廟增學田諸
事鄉人猶稱道之升江南大通道兩淮鹽運使致仕
貧不能歸即家於遵平年七十四子鯤能詩孫必達
陳玉璧 樗蒲譜玉璧字韞璞山東厯城人由蔭生
補光祿寺署正出同知江西贛州乾隆三年來守遵

義日夕思所以利民事無大小具舉民歌樂之郡故
多榭樹以不中屋材薪炭之外無所於取王肇循行
見之曰此青萊間樹也吾得以富吾民矣四年冬遣
人歸厯城售山蠶種兼以蠶師來至沅湘間蛹出不
克就志益力六年冬復遣歸售種且以織師來期歲
前到蛹得不出明年布子於郡治側西小邱上春繭
大獲遂遍諭鄉里教以放養繰織之法令轉相教告
授以種給以工作之資經緯之具民爭趨若取異寶
八年秋會報民間所獲繭至八百萬自是郡善養蠶
迄今百年遵綢之名與吳綾蜀錦爭價遵義視全黔

爲獨饒王璧之力也道光十八年題祀名宦祠

于芳柱 遵義紀聞字中齋山東人莅任初值乾隆

庚寅大歉每單騎入鄉指饑民而泣曰此江鬼遺之孽也江鬼謂前令江湄時署門外男女駢集呼號日干數芳柱急發倉穀賑之倉不繼委員至重慶借米數千石又盡捐其俸倡勸鄉城遠近士民量家出米或銀若干按寺觀之糧冊派銀以爲助四門煮粥以給來食者賴全活無筭在任數年當金川用兵奉文府屬照糧均派以供軍需庚寅派數每糧一兩始三錢二次五錢三次一兩癸巳派數每一兩始一錢二

次三錢三次一錢五分四次四錢芳柱禁役書無因
端腴削民皆踴躍恐後育才書院碑略郡舊設育才
湘川兩書院歲入租僅足延師就業者寥寥芳柱合
兩院爲一歲延一師住育才主講定育才歲入穀六
十八石地租銀一兩五錢以三十石爲束脩餘作膏
火役食歲課正額生童二十五名額外爲附課遇缺
拔補以湘川入穀三十石二斗地租銀五錢每名給
膏火穀一石二斗餘銀穀給承辦學書紙筆費月官
課二次首卷給筆資一錢五分二三名各一錢二分
於棚租內給發以紫霞山人公田穀二十三石二斗

并沙溪地租銀二兩五錢供生童課日飯食以府署
側居民地租銀一兩有奇備修葺之費又於講堂西
增學舍庖湢墻垣什器無不備具督學孫士毅名曰
啟秀書院自是肄業者至如歸焉

劉詔陞字行檢號研莊湖南衡山人進士乾隆間
以部員來守遵義於學校尤竭力振興以育才湘江
兩塾不給居四方學者於澤門黨新創湘川書院規
模宏廣講習日盛詔陞老於文暇卽與諸生談先正
程式請正者毫疵悉點摘以故一時多能文者教澤
所被郡人今猶嘖嘖然嘉慶中李騰華主教湘川卽

講堂左偏建祠祀之

趙遵律

字蘆洲一字穎谷封人河南郟城人進士

嘉慶間由翰林外任兩守遵義畱心民務澤以文雅
初建謫仙樓桃源山頂時攜文士觴詠其間繼至以
郡試院湫隘極府縣試卽各攜几案風日坐署中學
使臨院則補搭棚廠疎篷危案或雨流人擠才者閣
筆乃倡募脩建壯冠通省士苦以息時郡文獻多無
徵遵律招邑舉人陳懷仁商脩前志採錄粗有椎輪
懷仁以議論不合去旋遵律亦以老病告歸並新編
王所貴 遵郡紀事北直例監順治十七年任糧捕

通判時土地初定民事煩擾所貴與道府分理事各就緒性無私曲

王演

遵郡紀事字鹿柴湖廣荊山人貢生通判

遵義時

大師勦水西奉委轉餉於黔之開州六廣

上不違公下不病民復清丈桐梓縣田畝釐剔公平已酉攝桐篆恩德舊著愛戴尤切桐民有三至三望之愛陞大理寺少卿去

楊彩

遵郡紀事字素庵長白人初補紹興通判

康熙三十一年通判遵義樸實少文無作宦氣習一以親土恤民爲務開義館嚴保甲置欄柵以禁夜遊

不畏權不徇私兩攝遵義縣有清慎稱三十七年督
燼於火遵義修整糧捕署綏仁兩縣任之彩不忍勞
民一椽一瓦皆自置復買隙地廣其址宏敞倍昔是
時郡城隍廟火彩復捐廉重建三十九年奉委攝綏
陽縣道卒

張廷勳 遵郡紀事通判遵義勤於治盜能稱其職
莫與儔 行狀略字猶人號壽民獨山州人天性純
孝行規先民爲諸生卽有聲嘗試院與洪亮吉論辨
亮吉曰子理足氣壯必以名節著中嘉慶己未進士
改翰林院庶吉士散館用知四川鹽源縣歷著循績

有奸民請於木裏喇嗎安撫左所山置廠冶銀銅與
儔上狀持不可檄往勘申禁安撫項克珠至書生年
月日祠經堂歲誦長壽經以報德奏舉治行卓異假
知直隸邛州未任丁父憂終喪以母老請終養奉色
笑十四年母沒因請改職道光三年任遵義府教授
首戒多士勿以氣義理爲能因事嘆曰事當問理
是否而不在多寡言是寡也公否多亦私也彼我皆
是五可已矣我八彼是者二亦未遽爲得卽我十是
猶當與可轉路太急則橫應我且傷今某事我僅是
八耳某事十是矣彼已承不足五不罷一橫決不敢

知矣聽者易之後果 乃爭服有言翕然薄

飭遵之州縣隸喜魚肉士類立威往往賄釋人則詭
覆庇之某生而某生尙不及知州縣貿然索之校官
校官亦貿然以生員往隸飽輒無事與儔曰果士故
也具案來吾能黜之不得案徒辱吾士吾不能每堂
爭然所以約士益嚴士來請業者學舍如蜂房十九
賃屋以處訓諸生爲學當正趨向讀書當求實用作
文當本心得條教數千言以負士多不能強自潔時
周之復教曰此豈初心所願彼家人寡婦始自約束
時意乃慕宋伯姬陳孝婦不幸爲盜賊所汙遂行淫

洪知其非禮而不能自還卽是之謂甚可憐也夫負
擔之子且養家藁舂之婦且活子旣稱爲士授徒爲
業夫豈不能卽無其所佃田圃取半亦非可恥余鄉
舉前備嘗貧苦自謀不出二途願與諸生共之若心
力皆惜必奉身法網以爲便安則吾末如之何矣暇
日萃國老庶老敦古處者於庠序齒講孝弟仁讓與
諸生觀聽與人語從容和易有不可詞色凜然每面
責人過而過卽忘之門弟子受責懼再往比往乃若
平時後過舉又不可以懼受責不見見人小善行或
詩文一二語佳誦不去口故從遊者樂改過遷善平

生教人主切近篤實言治經歸於訓詁文字二十五年三月創祠漢三賢於學宮左曰吾不能精故訓成一家言媿十九年多士師惟三賢漢儒專門皆國故以此倡士有興者吾志畢矣七月卒年七十九學皆私謚貞定先生葬郡東八十里青田山著有二南近說仁本事韻喇嗎紀聞

遵義縣

明

胡崇明 陳志湖廣興州舉人崇禎丙子年任遵義知縣在官五載平情折獄隆禮斯文勤課程藝建學

有功通志作宗明

王佐聖 字克仲號臧菴南直長洲縣人宋文正公
旦之裔父騰程以萬厯舉人任巖州府推官佐聖其
仲子也甫入塾卓犖不羣書聲琅琅徹數間屋及長
遍覽經史至忠孝節義事輒撫膺擊節思身置其間
壬子領鄉薦旣而騰程沒哀毀如禮遺業悉以讓昆
弟曰吾幸登賢書無慮不給也已未春官樊良樞得
佐聖卷以第一薦不遂抑副車閉門里居足不入公
府素與周忠介姚文毅友善瑞禍起忠介被逮清流
皆隱跡佐聖晞晞慷慨日夕往還不爲卻傾事皆撫

其隱卒無以中之自是大貂鉗網株連鴛帖亦罔有踵而南者旋授青溪教諭敦實崇正士習丕變巡撫張國維首薦於朝擢知四川遵義縣以崇禎十四年四月十三日蒞任縣本古夜郎地爲楊酋世據萬厯中始平之時設郡縣未久俗剽悍好兵士司催徵每不應佐聖至曉以禮義申之條約剔弊政興文教恩威並施民咸悅服距城二十里卽水西諸酋巢穴佐聖知其必爲害也召募四鄉義勇躬自閱練以實邊備復單車陟巘策扼夷吭於水西人犯要衝地曰新站者捐資創立一城逾月而就時與將領鄭益顯王

尚明等往來巡視曰此城立寇至可以遏其鋒否則
俟彼過而截其後必無歸矣前崇禎七年水西酋長
小烏安祚遠司部酋趙國政來獻渭河一帶地方因
增設懷遠衛以國政爲指揮小烏死地復失於水西
國政無可歸遂於沙溪里耕屯安插恃強盛時蠶食
邊夷因與渠酋郭士奇吳上才等結怨是年八月十
七日士奇等覘國政赴府伏兵胡啓富家夜襲殺國
政於小十字街斃割其身首率眾至沙溪抄國政家
席捲其資財人口入深山中政父張安部將王加禮
等竄水西安祚新部請兵報仇士奇等亦據險自衛

乘間思逞佐聖曰報怨之與殺降曲直有在矣外恐
爨酋內購叛黨查給趙部男女三百餘口安酋等尸
安心受撫復請之上官躬率兵越數百里斬馘百陣
擒士奇上才歸置府獄向所陷於賊男婦唐貴等數
百皆復還賊瓦解宵遁遵人相慶曰賊不復窺邊矣
佐聖曰不然賊世以遵爲几上肉今雖被創來春必
大舉至宜急爲桑土計卽條陳守禦十策並請立決
士奇等當事者忌其功皆格沮佐聖無如何唯團練
民勇分防戒嚴明年四月朔賊吳上賢等果盡境入
寇檄鄉勇王選王之琴冉國柱等禦之於宣峰堙皆

敗沒賊長驅抵城下鎮將府官棄城請救不知所之
佐聖率民登陴以守至四日外援不至三更城破已
劫士奇上才出獄佐聖知事不可爲命妻顧攜諸孤
逃以印付次子恪慨然曰吾當一死以報朝廷此國
信不可爲賊得亟行矣從容命服仗劍坐堂上賊至
揮劍奮呼斬數賊遂爲所害而鬚眉凜然僵立不仆
賊驚爲神人皆下拜時十里土司義兵王尚明等皆
佐聖所訓練聞變各慟哭舉白旗進勦分兵新站城
扼其歸路且戰且追悉殲之無一還者而遵城復完
一如生前所計畫云崇禎十五年縣人建祠

戰沒

處以選之琴國柱三人配食子恪復上狀當事祀鄉

賢皆報允

纂錄

國朝康熙三十一年題祀名宦冊檔明詩綜一字魯生

國朝

關謙如遵郡紀事河南拔貢順治十七年知遵義縣時戎馬甫定城署倉庫事事待舉招徠綏集復不暇給謙如處之裕然一一就緒暇日輒與生童講論文藝多所成就在任七年歸老遵義士習民風蒸蒸日上漸起謙如之力也

王來賓

陳志康熙二十三年以夔州府糧廳署遵

義縣除濫規慎詞訟重學校三月而遵大治

陳瑄 遵郡紀事字修六江南高郵州進士康熙

二十四年知遵義縣時天下府州縣奉

修志遵義知府卒師沆創纂未集以事出瑄乃招集文

士程崇等據孫敏政舊志重加編集再匝月而成書

在任六年聽斷明確尤加意文教嘗試童子得李先

立文大賞之謂非池中物拳拳誘掖先立卒以文行

科第為一邑冠軍子調同考官得人稱最盛云以下

艱歸

蘇一綸 遵郡紀事字雪齋廣西蒼梧舉人康熙中

知遵義縣事事推誠寬猛相濟四閱月以憂去邑人
惜之

邱紀 遵郡紀事字至谷廣東程鄉縣人康熙四
十九年知遵義縣縣自入

國朝來民安物阜垂數十年康熙四十四年守令政繁
於上小民愁苦於下奸宄叠興漸以成俗姻娶扛樓
辭訟誣陷城鄉以拳棒相矜村落之穿窬不絕紀至
一切痛懲數月之間惡習頓改公餘喜接士問民間
不便者輒除之每出入儀衛不飾單騎自若日用所
需不勞民間一錢與知府童華祖同一清節邑人請

稍助薪水判云本府旣不以山窮水盡改節本縣詎敢爲饑食渴飲累民履任時有告城隍文以清白自矢激昂慷慨聞者動色在任多載能不愧所言云

王錫蕃 遵義紀聞山西舉人任遵義縣臨事明敏案無留牘清潭里民梅某上通水西下交湄甕爲數府賊窩賄賂通行書役皆其羽翼有控者爲之容隱錫蕃廉得罪狀遣軍西涼黨與悉戢盜風始衰

唐秉琰 遵義紀聞廣西鬱林舉人乾隆二十五年來宰遵義居官淡素待民不苛時知府梁敦書宰相子年七恃貴酷虐威紳士有控者輕則笞革重則發

遣秉琰不習夤緣與不合遂以老弱無才參罷自庚辰莅任卽有重修郡城之役工竣卽落職貧無一物寓縣城隍廟以卒士民哀之後大吏委勘諸屬城工皆被撥議郡城獨號完固秉琰之功也

羅存德 遵義紀聞四川營山人宰遵義勤明於政威德並施前任浙江沈鹿鳴來莅未久極有循聲江西饒九疑繼之日事飲博不理民事書役橫行縣中一切弊極時民謠云昨日去了沈青天今日來箇饒老官不坐大堂不審事白日喫酒夜賭錢里差下鄉急如火收糧等子大不凡蓋前任王錫蕃始立秋征

條規催納銀米止用滾單滾牌乾隆庚寅縣令江湄
廢去立管里差四鄉錢糧付里差收納地方大病至
是存德仍錫蕃舊規民皆便之存德治賊盜有名凡
犯四五案者裹之薦中用木枋箠手掌數十以炭炙
之以刃破之以鹽醋漬之腳亦如是犯一二者箠荆
條數百以十六斤鐵帽冠之宵小胆裂邑幾無盜凡
判田土婚姻理已屈尚爭不服者灌以大小便驅出
之後對質者皆肅然吐實聽命無敢矯辨時有閭羅
之目

趙雷生

安徽涇縣拔貢生時人不媿雷震遂媿故

名莅遵不攜家屬布衣蔬食忘其在官剛正不稍阿
附於民情洞見毫末有控者隨拘原告被告至卽判
結是非無庸人証齊集威恩並用情若父子民稱神
明甫三月府署甬壁壞舊規府署工程皆首縣供辦
府隸趣縣急雷生曰我無一錢與民民焉赴功此我
事也遂攜鋤畚躬其勞民爭赴之守大慙一日急召
雷生雷生方審判復曰此不過酒食事吾爲民不能
中已待畢而來及赴府客已散守怒故不見雷生曰
吾此一官豈爲趨承來哉明日遂攜印騎一馬至省
以印繳藩使府尚未知所之雷生已致仕矣

張人龍 字岱庵山東濮州人舉人選四川知縣初

任璧山值白蓮教匪亂招鄉勇數千親訓練之扼賊
於江口賊不敢近時領眾出鄰縣擊賊馘獲甚多不
以爲功丁憂起復分發貴州補授知遵義縣府差余
某者權力過令勢人龍至數其罪杖殺之除惡若仇
而錄囚遇情可矜者每流淚對之性嚴正不喜諂諛
臨事明決絲毫不能掩在署一切戲具皆除去有暇
惟習射作詩與紳士端品者細究民間利病城東培
英書院左右地久被侵漁爲勘定舊界增掌院東脩
後陞知曹安州旋卒州署人龍所至不攜眷屬未嘗

取民一錢卒後貧不能歸葬遵義士民醵金助之
胡秉鈞字遐思號理軒開泰人嘉慶乙丑進士知
河南扶溝縣降改縣訓導黜華敦實信從者眾爲文
根柢先輩經指授者濫習一變云卒官年七十並新編

正安州

明

郭維屏雲南通志昆明人萬厯乙酉舉人以從軍
平播有功任真安州知州時方改土設流一切制度
悉維屏經始後晉知府州人懷德畏威久而不替

國朝

徐階平 浙江嘉善人監生効力戶部營田議敘選

江南泰州吏目丁憂起復雍正十三年任正安吏目

憫州貧無蠶桑利購浙種教樹飼數年蠶利遍州境

復捐建三聖祠旁置絲綢市招四方商賈貿易在任

十三年嚴明節儉州有慈母之稱年六十三告休嘉

慶二十六年紳民建祠於三聖祠右蠶織家四時俎

豆之各省絲綢商至六月公祀始歸道光十六年知

府平翰詳請題奏准入祀名宦祠稿按階平父正誼

祖建善皆有名德載浙江通志階平告休後清貧不

能歸卽居郡城之楊柳街準其孫也

陳中 四川通志 塾江縣人雍正庚戌進士授翰林院檢討改官河南新鄭知縣歲饑所積廉俸悉以賑眾深得民心仕至正安州知州心齋隨筆荏正安三年興利剔弊民悅戴之

汪 歙 江蘇舉人治州振興百廢州治向無城郭官舍民居漫淹荆棘中歙至慨然詳請興修於乾隆二十四年運京鉛歸卽具文頒項鳩匠建城躬自時閱不避風雨數月城成屹然保障民得資扞禦保固歙之功也

謝之燧 直隸河間人監生正安自設州來不常厥

邑後移治古鳳乾隆丙子之燧來署州任見廛市豪
無垣蔽宵小易於出入乃創建四門以嚴啓閉又以
北關地脉鍾秀文廟因修之以興文東關地形近
於卑缺因補之以致富又以關廟狹陋不容拜跪且
將墮因捐俸倡建其力欲富貴州民事多類此

趙宜霖 江西南豐人嘉慶間兩牧正安勤求民瘼
莅任以川匪滋蔓卽相險要添卡差諭民集眾聚團
守望相助緝堵章程民爭奉守州與蜀地緊接後卒
無害又卽尹道真講堂故址建務本堂祀尹公籌祭
費及守祠爲州人觀感暇輒拔貢王曰瑚博搜覓問

撰爲州志徵地圖者賴焉並新編

桐梓縣

明

何珩

陳志湖廣人選貢萬厯庚子平播設桐梓

縣任自珩始珩依山因水爲城周圍三里厚五尺許設四門建縣堂置祠廟招四方民插丈爲業

萬建侯

陳志湖廣雲夢縣舉人是時桐梓縣新設

諸務未舉到任凡田賦差役供應費用以及公廨行署寺觀橋梁無不經營籌畫規制之周詳無闕略者建侯之功居多

洪維翰 邱志江西舉人萬曆四十七年到任天啟元年四川藺賊奢崇明倡亂據重慶陷桐梓賊至維翰坐縣堂罵賊不屈賊索印維翰曰印在喉下索銀曰銀在喉下顏色甚厲賊義之不敢辱閱三日詣虎峰之崇德廟作來桐記題詩於柱其末云憾乏張巡相拒力願爲厲鬼殺崇明遂自經死僕從之死者數人後賊平督撫以聞賜塋祭廕其子千戶職

按陳志作維幹通志沿之誤

黃啟鳴 明史忠義張振德傳遵義知縣洪維翰城陷奪印不屈死典史黃啟鳴亦死所司上其狀贈維

翰尚賓卿世廕千戶啟鳴重慶通判世廕百戶

按史文稱維翰遵義知縣與舊志不合當以舊志爲確

唐文燿

陳志廣西舉人崇禎間來令桐梓是時舊

俗未盡革文教未盡宣文燿以轉移化導爲已任授庠生傅爾訥輩及遵義之董子策以春秋每月進諸生覃自重等課之或相與登遊賦詩科第之開權輿於此又舉鄉飲勤讀法凡前之敝陋悉與更始而風俗一變二三年間瑞頻應之著有瑞詩集三瑞白鹿見魁巖群鶴棲衙樹三月菊開花

國朝

劉鎮國

邱志鎮作正

字龍璋三韓人監貢順治十七年

隨

大師

取遵義

因委署

桐梓

知縣

按縣題名記云

仕此二年荒者闢逃者返耕者治秀者絃誦於是建

學宮作廳事及退思堂解任時邑民感念爲立去思

碑二

賈志

賈國樞

山西曲沃人選貢康熙二十年來任桐梓

時吳逆甫平事待整理乃建積粟倉於治堂右常平

倉於治堂左勸士民捐穀實之用備緩急建義學於

城內東芝麓溪三處擇師訓邑子弟建養濟院於治

南以養孤老百廢具興實心爲民暇摘孫敏政舊志
續爲桐志一冊雖未刊行後來得所援據國樞創草
之力爲多

邱仲旦 字旦甫雲南嵩明州舉人雍正五年甫蒞
桐卽奉行勸首查丈郡歸黔後復奉清丈田畝仲旦
曰奔馳荆棘霜露中矢公矢慎俾民不爭桐邑自崇
禎末建學後學官無署歷貫民房以居至是仲旦始
捐建學署六間於黌宮左復建倉廩十間以貯預備
穀石增建義學一於城內自捐歲脩月膳延師課生
童邑中要務靡不修整訂補賈國樞舊志

並新編

綏陽縣

明

詹淑

況上進創建綏陽縣記按播州禹貢梁州

之境天文井鬼分野東西廣一千二百二十里南北
袤一千八十里秦爲夜郎唐貞觀初爲播州隸黔中
宋大觀中楊文貴以其地內附建遵義軍東北五百
里爲綏陽縣正安州太祖高皇帝迅掃寰區改爲播
州宣慰司領長官司六安撫司二萬厯戊戌酋應龍
作逆天厭酋惡天子詔中外六軍討而蕩平焉割播
地分黔蜀設府路州縣如幅員而蜀分綏陽縣治沿

前名地周廣一百五十里距今所建遵義軍民府九
十里距成都府二千一百二十里楚麻城詹侯以資
陽令單騎來治綏邑旣至區畫金筑里址創茅茨三
間慨然願忠九折坂之勞遂畚芟積棘剷除殘壘而
經始之期年廳廡臺級屏署夾室漸如法旣曰易苗
俗莫先於禮教於是且爲構蓬華祀先聖多方聚縫
掖之士解衣衣之推食食之率縣羣兒演習絃誦其
中輟簿書旁午之勞行詩書俎豆之事又二年倉廩
庫獄賓館行臺與凡禋百神傳驛郵遞市廛道路不
減中州觀而駸輻輳尤致期嚴城郭溝塗之役城高

十二尺週四百七十九丈六尺土實石堅足以遮專
鎖鑰至若溝洫則旋眎旋戒桑麻則隨諭隨滋惟學
校未奉旨又首倡諸郡縣奏記都御史臺行督學使
者暫寄衣巾以陶文物三爭之遂得以歲考發諸生
七名士寄學生二名案行遵義軍民府庠儒學肄業
以候題准建學且爲書手答掌教者曰新附籍窮生
皆擔簦躡屨而來故一切禮文且從簡披衷作育俾
化行千百年楚水泮阿之風皆改觀繼督湯指揮使
武解網視城不相警備曰卽有跳弄耨鋤以撓疆里
者惟有司失乎字牧耳山間聞之皆舉手加額故苗

頑如馮老四羅老七等歷來出沒草澤爲暴劫擄咸
面縛至餘黨散亡不勝數又詔分委諸執事按畝徵
價則壤之衆偶語去而莫禁於是駭而亟奏得調徵
悉安堵縣四境接壤府路州縣旣稱腹裏不應別設
屯田以侵漁田賦有把總貪婪謀畱屯以遺蠹孔於
是詳記部院遵照諸設郡邑事例止屯於邊徼水西
蘭州地方把總各以罪去焉經理方周祇因文明蒲
浙葛羅三水田地界連湄潭偶相爭質則又詳由申
記得照田地旣以歸湄科糧卽湄認納而爭端杜矣
諸生陳其善爲涪人悉以其創建來言於不佞是以

知其善政也昔周單子聘楚而過陳見其道穢而川澤不陂梁客至不授館野祭有被髮遂知其國危蓋城郭道路倉廩塾寓周官首謹之而況化苗杜後之期於臧乎侯作法預備周至而專化服故曰知爲善政也侯諱淑字善甫號懷野乙未一榜行廉心古蔬食緼袍不減青衿每中夜進諸生眺月環坐而譚蜀吏曰清獻可勉而學文翁則效顰之尤難侯蓋道德文章獨得剏始之微權故本其斤斤未得建學之意而記之惟詳焉萬厯甲辰年八月記陳志綏邑之興實自淑始民家至今猶稱爲詹家公建祠專祀後遷

馬湖太守綏陽志字士善

母楊祖 陳志北直天津衛人知綏陽時清廉勤慎有惠政得民心綏人祠祀之

龔三級 綏陽志四川江津人崇禎間歲薦操履清慎學務躬行鄉閭以爲式仕綏陽教諭日與諸生講論多所成就綏學登雋自此始陞安順府推官辭不赴旣歸惟以書史娛老巖於義方二子弱冠掇科不稍寬假其動遵古禮雖兵燹之際未嘗或弛云祀邑名宦祠

國朝

鄒宗彥 陳志字羽儀湖廣麻城人進士自一統後始來令綏是時地方凋殘士民失業下車以勸農課士爲首務捐俸修學宮城垣公署取邑諸生與講春秋不三年人文蔚起以春秋登賢書者科不乏人蜀士子聞風慕教者遍焉在任八年卒於官綏陽志宗彥與詹淑皆麻城籍邑人歌曰前有詹父後有鄒母比之召杜云立德政碑於學宮

李 鎧 陳志字公凱江南山陽人進士鎧至孝偕母到任鐵面冰心言笑不苟凡決獄催科母數誠以爲古循吏鎧惟訓是遵小大之獄必以情夏秋之征

定其例至於補葺 文廟更置先賢木主一切祭器
並翻然一新暇進諸生授以小戴記作人之化居多
王子母卒於署鎧哀痛摧切闔邑諸生爲廢蓼莪迄
今綏人孝行益敦者皆由鎧之興起云

張 最 綏陽志字浴齋湖廣應城人進士康熙二
十七年宰綏宅衷仁愛爲政精明芟苴盡絕獄無冤
滯公餘進諸生傳經多士景從改建學宮奉丈田畝
公廉仁恕士民德之

支神駿 綏陽志江南崑山舉人康熙五十五年宰
綏陽修葺 文廟力行善政卒於官公請入祀名宦

祠

黃燾世

字雲若山東卽墨人進士雍正三年宰綏

撫字六載以興利除害爲急捐俸修崇聖祠規模宏敞又修建先農壇關帝廟忠孝節義祠育嬰堂養濟院及置文廟祭器並不累民間一錢縣中糧銀舊付銀匠傾銀每錠或折多至四五錢燾世悉平發平收民免前累又種靛耆向例廠各納紅銀十二兩至是盡除之陞大理寺左評事去民爲建去思碑探去思碑

唐椿

廣西桂林人副榜宰綏陽多德政縣糧明

代原額四千八十三兩有奇康熙中歷經報墾載實

徵止三千一百有奇餘爲荒冊後奉行增復舊額前
令遂按冊概令承糧致現征冊有與荒冊姓名糧數
同者復令承首使一戶納兩戶之糧其逃戶絕戶田
土不知著落又止以荒名在甲令甲眾攤派致爭訴
不已椿力詳豁免重戶懸荒並焚荒冊民以免重累
又縣城永興旺草諸場及黃魚江等處自康熙十二
年後漸次抽落地稅銀共六十六兩椿並詳請豁免
商賈便之綏陽有詹淑撰圖志久散失前令鄭松齡
草創未及半椿續成粗槁使以前事不至盡無徵者
椿之力也

莫南金

字

都勻

縣人乾隆辛卯舉人爲綏陽

縣教諭誘掖有法諸生親之若父子南金爲文才氣縱橫似杭世駿齊召南而與諸生言各隨其所近殊不欲其拘拘似已也

並新編

袁養正

福建上杭人

副榜性仁慈精岐黃書宰綏

時凡聽訟不加咎責非者斥之又教導之邑值旱躬

勘村落沿途見饑民流涕不已百姓知其精醫便抱

小兒卽馬前

治必脈之與以方乃行凡試生童文

稿甫就半必一一親閱佳者大獎誦劣者爲講說刺

刺不休如父兄之教子弟故人皆稱爲袁慈母一歲

大疫死者累養正自省歸急出方藥散四鄉藉活者數千人遺愛至今稱道不衰

李曉巒

山東海陽舉人甫莅綏時黃魚橋石碓窩

距城十餘里等處匪人雜集常夜往偵擒爲首者治以罪任未兩月四境肅然居人至夜不閉戶在任日不設傳事不用承發日坐大堂來控者隨批隨審無事則卽案上朗誦經史招諸生坐堂下爲析疑義口講指畫有所呈文頃爲批點春耕時必躬至田間步行勸農甫開征戶書以糧冊進請示加秤星曉巒擲冊於地起罵曰爾欲盡食吾百姓膏脂乎不顧走去

糧弊因以悉清居常樸儉自守凡書役毋許衣帛城鄉惡少無敢撓辯曳履賭博罔獵皆其化也以忤上去官百姓哭聲載道送出境者數千人爲立生祠時

享不絕

並新編

仁懷縣

國朝

何雨 江南丹徒人監生康熙末宰仁懷愛民如

子幾於無訟父老至今猶嘖嘖稱之時上民私建生祠雨知之決不肯受令改作文昌宮眾立有德政碑尚存

王作礪 字他山山東曹縣人進士治仁懷三載
歌頌之時公立德政碑云渾厚溫爲精明赤心形爲
鐵面卻暮夜之金錢飭廉隅之圭璧仁讓化行十里
恩膏注滿于家人以爲寶錄云並新編

杜 詮 仁懷志雲南馬龍州舉人雍正十一年莅
仁懷任縣城故在赤水北不可控制詮相陰陽觀流
泉謂遷邑莫如亭子壩善詳請改建新城工未竣會
被劾瀟如也居太初堂畢其事其言曰城初也堂亦
初也故名曰太初詮在生界行署三年以儒雅澤吏
治民愛戴之及劾去時總督張廣泗大功新集修貴

州通志以詮名宿徵與靖道謨總其事援引該博考古家資之

蒙浚關西人性剛直宰仁時於公事一絲不紊於民間一毫不取時邑無城隍廟浚創建之一日因事至赤水輿經深箐中有老父忽至前獻一木葉形如枇杷葉上有佛像不知何名人謂德政所致編新向廷颺西川通志成都舉人任仁懷知縣興利剔弊獄無繫囚值歲饑縣邊鄙流民數百人來就食廷飭命人於各鄉里設粥廠就撫饑民泣語曰爾輩皆吾赤子饑至此吾爲父母者能辭咎乎但法不可犯

勿滋事茲有粥暫度朝夕可待秋成饑民聞言歡呼
復開倉施賑不待報卽行自申請參大吏嘉獎閱三
載以勞瘁卒於官

李紹祖 修文人歲貢經學湛深精形家言所指點
不亞賴布衣垂老任仁懷訓導教士有法其鬚眉皓
然眸子炯炯見之者以爲南榮間人也卒於官

李振文 山西榆次人進士乾隆中宰仁懷嚴正廉
明民不敢欺七里有神君之頌創修懷陽書院教邑

生童時文教稱盛焉

緝新

陳正坤 字厚堂四川墊江舉人以軍功授仁懷知

縣歷威寧知州古州同知所至有異績

通志仁懷

文廟經五十餘年未葺將圯正坤捐倡重修

體制美備

時頌者謂不鄙吾民動以禮德

新編

武官

明

周萬全 朱燮元奢崇明陷重慶紀略遵義參將萬

全同遇害按萬全擊賊桐梓與大戰敗死遂葬桐地

黑石溪之陽妻李氏爲武弁所迫閉戶自縊葬遵義

城東府學宮左魁星閣牆外墓及碑今尚存子希賢

爲四川威茂等處地方總戎僞永歷二年敕授龍虎

將軍護軍開革後死其墓銘曰父死難母死節黃山
呱呱怙恃兩失卓矣魯哉維公之職或疑紀略萬全
別是一人不知紀略與周氏譜載其官其事正合傳
寫者脫去周姓非所疑也

國朝

章桂芳 四川通志安岳縣人明崇禎時從戎授千
總以征西粵有功陞遊擊復以征楚平播功陞總兵
守湖南長州加沿勒將軍人畏之號曰黑神順治十
八年投誠屯鎮遵義永安莊康熙初年致仕
王國忠 季先立撰德政碑略字擎庵號輪山福建

人康熙辛未由寧都移鎮遵義初下車嚴明約束整
什伍討軍實汰老弱補虛懸號令惟明賞罰惟允由
偏裨逮卒徒宛然家人父子之相接郡比閭率編茅
延燒無虛歲國忠至凡禳火之術救火之具區畫盡
善民始寧居戊寅二月十七日城南火突發城內外
一時俱燼死者不知其數夜兵民譁無固志國忠按
部不動平明賑給慰勞視昔有加咸稱將軍活我常
病郡人赴渝就試每與當事商議輒以棚廠未設爲
辭後士子屢懇於省皆國忠捐俸助資斧又設義塾
教邑子弟館初在外大火後移置鼓樓訓導不綴郡

舊產丹砂有採得其地者請問採不許時有賂以千金囊以走省會走京師且出怨言國忠堅執不動奸黠赴省具訴卒以國忠持之力下令封禁國忠在邇凡利之當興弊之當除苟利民社悉和衷濟之不計事由已出功由已成而循循長者謙光自牧凡士之敦孝弟廉恥曉達世務與通一藝以上者悉羅致幕下公餘作詩歌古文詞無虛日時與山人野客煮茶評畫以博山水之趣丁丑丁母艱兵民赴省乞畱大吏爲轉奏

勅畱任邇郡紀事後辭職求閒業遵義之南鄉軍民時赴

莊問起居往來如織心齋隨筆著有陶情集

程振遵邵紀事字聖友福建人任遵義右營遊

擊和平溫雅有儒將之風康熙三十六年辭職卜築遵義南鄉闔營建去思碑於署前以頌遺愛二子庠生

魏相唐廉魏相生祠碑略字公輔甘肅靖遠人

初官陝西都司值吳逆變相佐軍恢復鳳縣及保寧等處以功漸次署甘肅涼州鎮務者各三旋推陞荊州遊擊繼爲川陝總督席隆遵義協鎮都督於康熙四十年莅任凡十三年時遵營兼轄西陽石砭土

司鎮雄土府漢土軍兵叢雜難理相簡閱訓練約束
嚴明恩威兼濟遐邇均安土馬飽騰糗糧充足善政
難以覩縷

天子謂保寧爲重鎮且爲相先所恢復之區因陞川北總戎
士民去思不忘就相捐修大士閣左側建生祠肖像
祀之

海常 鑲白旗漢軍明德佐領下人由雲南城守
營參將累功陞補遵義協鎮訓練有法調征四川致
匪與賊戰於通江縣之觀音廟陣沒

櫟冊

遵義府志卷二十